

Apeqquteqaat aallaavigalugu oqallisissiatut siunnersuutigineqarpoq, qanoq ililluta Kalaallit Nunaata politikikkut annerpaamik siammasinnerpaamillu nunanut allanut politikikkut tungasunut matumanilu aamma qallunaat naalagaaffiannut isumaqatiginninniarnernut tunngatillugu piginnaatitaaffeqarnissaa.

(Inatsisartunut ilaasortaq Anna Wangenheim, Demokraatit)

Akissuteqaat

(Naalackersuisut siulittaasuat)

Apeqquteqaat aallaavigalugu oqallinnissamut soqutiginaratumut siunnersuuteqartoq Anna Wangenheim, Demokraatit, Naalackersuisut sinnerlugit qutsavigaara.

Nunatut nunanut allanut ataqatigiissumik nukittuumillu politikeqarnissarput tamatta isumaqatigiissutigaarput, soorluttaaq qularutigineqassanngitsoq nunarsuatsinni, ingammillu Issittumi, ineriartorneq pillugu annertunerpaamik sunniuteqarnissarput kissaatigigipput.

Uagununa Issittumi najugaqartuusugut, tamanna pissutigalugu pissusissamisuuginnarpoq Issittumut tungasunut sinniisuullutalu aalajangiisuussagutta, aqutissarpullu sumut ingerlassanersooq aalajangiiffigisarutsigu, uaguttaarlumi taakkuuvugut Issittumi pissutsit allanngoriartorerata nassatarisaasa pitsaaqutissaannik atorluaasussat.

Nunat qanoq ikkaluartulluunniit, angisuut mikisulluunniit, tamarmik anguniagarisarpaat nunanik allanik suleqateqartarnissaq. Tamakkunani eqqortumik ammasumillu isummat aalajangiussimasat saqqummiuttarnissaat pingaartuuvoq, aamma qulequttatut sammisat assigiinngitsut isummerfigineqaraangata. Taamatullu periuseqartassaagut isumaqatigiissutaasimasut peqataaffigisavut, nunallu tamalaat akornanni ileqqoreqqusaasartut malittaralugit.

Kalaallit Nunaat Kunngearfiup iluani nunanut allanut sillimaniarnermullu tamakkiisumik politikeqarnermi pingaaruteqariartuinnarpoq. Taamatut inissisimanerput periarfissanik nutaanik ammaasuvoq, aammattaq nunat uagutsinnut akisussaaffimmik pisussaaffeqarnermillu annertunerusumik peqalernissamik tamanna nassataqarpoq.

Siorna oktobari qaammat Kalaallit Nunaat, Danmark USA-lu nutaamik isumaqatigiissusiorput, tassanilu allaqqavoq Pituffimmi sakkutooqarfik pillugu kiffartuussinissamut isumaqatigiissut siunissami ingerlatsiteqartigiiffimmut Kalaallit Nunaanni najugalittut allattorsimasumut tunniunneqassasoq.

Erseqqissumillu oqaatigaarput Kalaallit Nunaanniinaraanni Kalaallit Nunaat avaqqunneqarsinnaanngitsoq.

Uagut pineqartilluta pisunut peqataanngikkutta angusaqarfiunaviannilaq – taamatut oqariartuuterput apuupparput. Erseqqissaatigaarpullu suleqatigiinneq illugiissumik ingerlanneqassasoq, taamatullu illugiissunut iluaqutaallunilu pisussaaffiliisuussasoq

Aasaq Kunngearfiup iluani Naalackersuisinikkut siuttut naapinneranni aamma kusanartumik angusaqarfiuvoq. Tassani nunanut allanut, sillimaniarnissamut sakkutooqarnikkullu politikeqarneq pillugu annerusumik sunniuteqartarnissarput pillugu isumaqatigiissusiorpugut. Tassungalu ilanngullugu aamma eqqaaneqassaaq Issittumi Siunnersuisoqatigiinni ataatsimiittoqartillugu piginnaaneqartitsisarnerup agguataarneqartarnerata iluani nutaamik isumaqatigiissusi-oqqammernerput, tamatuma nassataraa Issittumi Siunnersuisoqatigiit iluanni naalackersuisut ataatsimiikkaangata Kalaallit Nunaat oqaaseqaaqqaartuusassasoq, Kunngearfillu Danmark sinnerlugu naalackersuisutigut nalunaarusianik atsiortalissasoq.

Isumaqatigiissutit taakku marluk naligiinnerusumik suleqatigiinnissamut aqputissiuissuupput pingaarutillit, isumaqatigiissutillu taakku aqputigalugit Kalaallit Nunaat nammineq pilluta qitiusumik tunngassuteqartuni sulii annertunerusumik aalajangiisinnaassuseqalissaaq.

Inatsisartut Nunanut Allanut, Sillimaniarnermullu Ataatsimiititaliaata akuutinneqarnissaat Naalackersuisut annertuumik pingaartitaraat. Nunanullu allanut politikikkut tunngassutilinni sammisani qulequttanilu pisuni tamani ataatsimiititaliap sioqqullugu kingoqqullugulu ilisimatittuarnissaat ingerlaavartumik sulissutigaarput.

Naalackersuisut ilisimavarput Inatsisartut Nunanut Allanut, Sillimaniarnermullu Ataatsimiititaliaata Naalackersuisunik suleqateqarnissaaq annertusarniarlugu sulissutigigaat. Tamanna Naalackersuisunit tikilluaqqarput, piffissamilu aggersumi pimoorussilluta ataatsimiititaliaq Kalaallit Nunatta nunanut allanut sillimaniarnissamut illersornissamullu politikkeqarnerata siunissami ineriartortinnissaanut akuutissavarput.

Taamatut oqaaseqarluta Naalackersuisut maani inersuarmi oqallinnissamut pissanganartumut peqataanissatsinnut qilanaarpugut.